

清·彭定求

全唐詩

伍



延边人民出版社

全唐詩

[清] 彭定求 等編

⑤

延边人民出版社

全唐诗卷二百三十三

杜甫

晓发公安原注：数月憩息此县。

北城击柝复欲罢，东方明星亦不迟。邻鸡野哭如昨日，物色生态能几时。舟楫眇然自此去，江湖远适无前期。出门转眄已陈迹，药饵扶吾随所之。

泊岳阳楼下

江国逾千里，山城仅百层。岸风翻夕浪，舟雪洒寒灯。留滞才难尽，艰危气益增。图南未可料，变化有鲲鹏。

缆船苦风，戏题四韵，奉简郑十三判官泛

楚岸朔风疾，天寒鸬鹚呼。涨沙霾草树，舞雪渡江湖。吹帽时时落，维舟日日孤。因声置驿外，为觅酒家垆。

登岳阳楼

昔闻洞庭水，今上岳阳楼。吴楚东南坼，乾坤日夜浮。亲朋无一字，老病有孤舟。戎马关山北，凭轩涕泗流。

陪裴使君登岳阳楼

湖阔兼云雾，楼孤属晚晴。礼加

徐孺子，诗接谢宣城。雪岸丛梅发，春泥百草生。敢违渔父问，从此更南征。

过南岳入洞庭湖

洪波忽争道，岸转异江湖。鄂渚分云树，衡山引舳舻。翠牙穿浪桨一作蒋，碧节上一作吐寒蒲。病渴身何去，春生力更无。壤童犁雨雪，渔屋架泥涂。欹侧风帆满，微冥水驿孤。悠悠回赤壁，浩浩略苍梧。帝子留遗恨，曹公屈壮图。圣朝光御极，残孽驻艰虞。才淑随厮养，名贤隐锻炉。邵平元入汉，张翰后归吴。莫怪啼痕数，危樯逐夜乌。

宿青草湖重湖，南青草，北洞庭。

洞庭犹在目，青草续为名。宿桨依农事，邮签报水程。寒冰争倚薄，云月递微明。湖雁双双起，人来故北征。

宿白沙驿原注：初过湖南五里。

水宿仍余照，人烟复此亭。驿边沙旧白，湖外草新青。万象皆春气，孤槎自客星。随波无限月一作景，的的近南溟。

湘夫人祠即黄陵庙

肃肃湘妃庙，空墙碧水春。虫书玉佩藓，燕舞翠帷尘。晚泊登汀树，微

馨借一作香惜渚蘋。苍梧恨不尽，染泪在丛筠。

祠南夕望

百丈牵江色，孤舟泛日斜。兴来犹杖屨，目断更云沙。山鬼迷春竹，湘娥倚暮花。湖南清绝地，万古一长嗟。

登一作发白马潭

水生春缆没，日出野船开。宿鸟行犹去，丛花一作花丛笑不来。人人伤白首，处处接金杯。莫道新知要，南征且未回。

归雁

闻道今春雁，南归自广州。见花辞涨海，避雪到罗浮。是物关兵气，何时免客愁。年年霜露隔，不过五湖秋。大历二年，岭南节度使徐浩奏：十一月二十五日，当管怀集县阳雁来。先是五岭之外，翔雁不到，浩以阳为君德，雁随阳者，臣归君之象。诗盖深讥之。

野望

纳纳乾坤大，行行郡国遥。云山兼五岭，风壤带三苗。野树侵江阔，春薄长雪消。扁舟空老去，无补圣明朝。

人乔口原注：长沙北界

漠漠旧京远，迟迟归路赊。残年傍水国，落日对春华。树蜜早蜂乱，江泥轻燕斜。贾生骨已朽，凄恻近长沙。

铜官渚守风渚在宁乡县

不一作亦夜楚帆落，避风湘渚间。水耕先浸草，春火更烧山。早泊云物

晦，逆行波浪慳。飞来双白鹤，过去杳难攀。

北风原注：新康江口信宿方行。

春生南国瘴，气待北风苏。向晚霾残日，初宵鼓大炉。爽携卑湿地，声拔洞庭湖。万里鱼龙伏，三更鸟兽呼。涤除贪破浪，愁绝付摧枯。执热沉沉在，凌寒往往须。且知宽疾肺，不敢恨危途。再宿烦舟子，衰容问仆夫。今晨非盛怒，便道即一作却长驱。隐几看帆席，云山涌坐隅。

双枫浦在浏阳县

辍棹青枫浦，双枫旧已摧。自惊衰谢力，不道栋梁材。浪足浮纱帽，皮须截锦苔。江边地有主，暂借上天回。

奉送王信州崑北归

朝廷防盗贼，供给愍诛求。下诏选郎署，传声能典一作典信州。苍生今日困一作起，天子向时忧。井屋有烟起，疮痍无血流。壤歌唯海甸，画角自山楼。白发寐常早，荒榛农复秋。解龟逾卧辙，遣骑觅扁舟。徐榻不知一作能倦，颖川何以酬。尘生一作老尘彤管笔，寒赋黑貂裘。高义终焉在，斯文去矣休。别离同雨散，行止各云浮。林热鸟开口，江浑鱼掉头。尉佗当是指崔旰辈虽北拜，太史尚南留。军旅应都息，寰区要尽收。九重思谏净，八极念怀柔。徒倚瞻王室，从容仰庙谋。故人持雅论，绝塞豁穷愁。复见陶唐理，甘为汗漫游。

江阁卧病走笔寄呈崔、卢两侍御

客子庖厨薄，江楼枕席清。衰年病只瘦，长夏想为情。滑忆一作喜雕胡饭，香闻锦带羹。溜匙兼暖腹，谁欲致一作觅杯罍。

潭州送韦员外牧韶州迺

炎海韶州牧，风流汉署郎。分符先令望，同舍有辉光。白首多年疾，秋天昨夜凉。洞庭无过雁，书疏莫相忘。

江阁对雨，有怀行营裴二端公裴虬与讨臧玠，故有行营。

南纪一作极风涛壮，阴晴屡不分。野流行地日，江入度山云。层阁恁雷殷，长空水面一作面水文。雨来铜柱北，应一作意洗伏波军。

酬韦韶州见寄

养拙江湖外，朝廷记忆疏。深惭长者辙，重得故人书。白发丝难理一作并，新诗锦不如。虽无南去雁，看取北来鱼。

千秋节有感二首八月二日为明皇千秋节

自罢千秋节，频伤八月来。先朝常宴会，壮观已尘埃。凤纪编生日，龙池堑劫灰。湘川新涕泪，秦树远楼台。宝镜群臣得，金吾万国回。衢尊不重饮，白首独余哀。

御气云楼敞，含风彩仗高。仙人张内乐，王母献宫桃。罗袜红蕖艳，金羁白雪毛。舞阶衔寿酒，走索背秋毫。圣主他年贵，边心此日劳。桂江流向

北，满眼送波涛。

晚秋长沙蔡五侍御饮筵，送殷六参军归澧州觐省

佳士欣相识，慈颜望远游。甘从投辖饮，肯作置书邮。高鸟黄云暮，寒蝉碧树秋。湖南冬不雪，吾病得淹留。

湖中一作南送敬十使君适广陵

相见各头白，其如离别何。几年一会面，今日复悲歌。少壮乐难得，岁寒心匪他。气缠霜匣满，冰置玉壶多。遭乱实漂泊，济时曾琢磨。开容吾校老，胆力尔谁过。秋晚岳增翠，风高湖涌波。騫腾访知己，淮海莫蹉跎。

长沙送李十一衔

与子避地西康州，洞庭相逢十二秋。运愧尚方曾赐履，竟非吾士倦登楼。久存胶漆应难并，一辱泥涂遂晚收。李杜齐名用杜密，李膺李固、杜乔旧事为喻。真忝窃，朔云寒菊倍离忧。

重送刘十弟判官

分源豈韦派，言刘、杜同出也。范宣子曰：在商为豕韦氏，在周为唐杜氏。别浦雁宾秋。年事推兄忝，人才觉弟优。经过辨丰剑，意气逐吴钩。垂翅徒衰老，先鞭不滞留。本枝凌岁晚，高义豁穷愁。他日临江待，长沙旧驿楼。

奉赠卢五丈参谋原注：时丈人使自江陵，在长沙待恩旨，先支率钱米。

恭惟同自出，甫祖母卢氏，即所志范阳太君者。妙选异高标。人幕知孙楚，披襟得郑侨。丈人藉才地，门阔冠云霄。老矣逢迎拙，相于契托饶。赐钱倾府待，争米驻一作贮船遥。邻好艰难薄，氓心杼轴焦。客星空伴使，寒水不成潮。素发千垂领，银章破在腰。说诗能累夜，醉酒或连朝。藻翰惟牵率，条湖山合动摇。时清非造次，兴尽却萧条。天子多恩泽，苍生转寂寥。休传鹿是马，莫信鸱如一作为鸱。未解依依袂。还斟泛泛瓢。流年疲蟋蟀，体物幸鹪鹩。辜一作孤负沧洲愿，谁云晚见招。

登舟将适汉阳

春宅弃汝去，秋帆催客归。庭蔬尚在眼，浦浪已吹衣。生理飘荡拙，有心迟暮违。中原戎马盛，远道素书稀。塞雁与时集，樯乌终岁飞。鹿门自此往，永息汉阴机。

暮秋将归秦，留别湖南幕府亲友

水阔苍梧野一作晚，天高白帝秋。途穷那免哭，身老不禁愁。大府才能会，诸会德业优。北归冲雨雪，谁一作俱恸敝貂裘。

送卢十四弟侍御护韦尚书之晋灵柩归上都二十韵

素幕渡江远，朱幡登陆微。悲鸣驷马顾，失涕万人挥。参佐哭辞毕，门栏谁送归。从公伏事久，之子俊才稀。长路更执纆，此心犹倒衣。感恩义不

小，怀旧礼无违。墓待龙骧诏，台迎獬豸威。深衷见士则，雅论在兵机。戎狄乘妖气，尘沙落禁闱。往年朝谒断，他日扫除非。但促一作整铜壶箭，休添玉帐旗。动询黄阁老，肯虑白登围。万姓疮痍合，群凶一作雄嗜欲肥。刺规多谏净，端拱自光辉。俭约前王体，风流后代希。对歛期特达，衰朽再芳菲。空里愁书字，山中疾采薇。拨杯要忽罢，抱被宿何依。眼冷看征盖，儿扶立钓矶。清霜洞庭叶，故就别时飞。

哭韦常侍峄二首

一代风流尽，修文地下深。斯人不重见，将老失知音。短日行梅岭，寒山一作江落桂林。长安若个畔一作伴，犹想映貂金。

青琐陪双人，铜梁阻一辞。风尘逢我地，江汉哭君时。次第寻书札，呼儿检赠诗。发挥王子表，《汉书》有《王子侯表》。不愧史臣词。

哭韦大夫之晋

凄怆郁瑕色一作邑，一作地，差池弱冠年。丈一作大，一作士人叨礼数，文律早周旋。台阁黄图里，簪裾紫盖边。尊荣真不忝，端雅独悠然。贡喜音容间，冯招左思诗：冯公岂不伟，白首不见招。病疾缠。南过骇仓卒，北思悄联绵。鹪鸟长沙讳，犀牛蜀郡令。素车犹恸哭，宝剑欲高悬。汉道中兴盛，韦经亚相传。冲融标世业，磊落映时贤。城府深朱夏，江湖渺霁天。绮楼关一作高树顶，飞旆泛堂前。帝音亦幕疑一作旋风燕，笳萧急暮蝉。兴残虚白室，迹断孝廉船。童孺交游尽，

喧卑俗事牵。老来多涕泪，情在强诗篇。谁寄方隅理，朝难将帅权。春秋褒贬例，名器重双全。

舟中夜雪，有怀卢十四侍御一作郎弟

朔风吹桂水，朔一作大雪夜纷纷。暗度南楼月，寒深北渚云。烛斜初近见，舟重竟无闻。不识山阴道，听鸡更忆君。

对雪

北雪犯长沙，胡云冷万家。随风且间一作开叶，带雨不成花。金错囊从一作徒罄，银壶酒易赊。无人竭浮蚁，有待到昏鸦。

楼上

天地空搔首，频抽白玉簪。皇舆三极北，身事五湖南。恋阙劳肝肺，论一作抡材愧杞楠。乱离难自救，终是老湘潭。

冬晚送长孙渐舍人归州

参卿参谋也休坐轝，荡子不还乡。南客潇湘外，西戎鄂杜旁。衰年倾盖晚，费日系舟长。会面思来札，销魂逐去樯。云晴鸥更舞，风逆雁无行。匡里雌雄剑，吹毛任选将。

暮冬送苏四郎偕兵曹适桂州

飘飘苏季子，六印佩何迟。早作诸侯客，兼工古体诗。尔贤埋照久，余病长年悲。卢馆须征日，楼兰要斩时。岁阳初盛动，王化久磷缁。为人苍梧庙，看云哭九疑。

风疾舟中伏枕书怀三十六韵，奉呈湖南亲友

轩轹休制律，虞舜罢弹琴。尚错雄鸣管，犹伤半死心。四句言风疾。圣贤名古邈，羁旅病年侵。舟泊常依震，湖平早一作半见参。如闻马融笛，若倚仲宣襟。故国悲寒望，群云惨岁阴。水乡霾白屋一作屋，枫岸叠一作全青岑。郁郁冬炎瘴，蒙蒙雨滞淫。鼓迎非一作方祭鬼，弹落似鸢禽。兴尽才无闷，愁来遽不禁。生涯相汨没，时物自一作正萧森。疑惑尊中弩，淹留冠上簪。牵裾惊魏帝，投阁为刘歆。狂走终奚适，微才谢所钦。吾安藜不糝，汝贵玉为琛。乌几重重缚，鹑衣寸寸针。哀伤同庾信，述作异陈琳。十暑岷山葛，三霜楚户砧。叨陪锦帐座，久放白头吟。反朴时难遇，忘机陆易沈。应过数粒食，得近四知金。春草封归恨，源花费独寻。转蓬忧悄悄，行药病岑岑。瘞天追岳岳，持危觅邓林。蹉跎翻学步，感激在知音。却假苏张舌，高夸周宋鞞。鞞，剑鼻也。《庄子》：天子之剑，以周、宋为鞞，韩、魏为铉。纳流迷浩汗，峻址得嵌崟。城府开清旭，松筠一作董起碧浔。披颜争倩倩，逸足竞駸駸。朗鉴存愚直，皇天实照临。公孙仍恃险，侯景未生擒。书信中原阔，干戈北斗深。畏人千里井，问俗九州箴。战血流依旧，军声动至今。葛洪尸定解，许靖力还一作难任。家事丹砂诀，无成涕作霖。

奉赠萧二十使君

昔在严公幕，俱为蜀使臣。艰危参大府，前后间清尘。原注：严再领成都，余复参幕府。起草鸣先路，乘槎动

要津。王鳧聊暂出，萧雉只相驯。终始任安义，荒芜孟母邻。联翩匍匐礼，意气死生亲。原注：严公歿后，老母在堂，使君温清之问，甘脆之礼，名数若己之庭闈焉。太夫人顷逝，丧事又首诸孙主典，抚孤之情，不减骨肉，则胶漆之契可知矣。张老晋大夫张孟，语称张老。存家事，嵇康有故人。食恩惭卤莽，缕骨抱酸辛。巢许山林志，夔龙廊庙珍。鹏图仍矫翼，熊轼且移轮。磊落衣冠地，苍茫土木身。坝^{〔注〕}鸣自合，金石莹逾新。重忆罗江外，同游锦水滨。结欢随过隙，怀旧益沾巾。旷绝含香舍，稽留伏枕辰。停驂双阙早，回雁五湖春。不达长卿病，从来原宪贫。监河受贷粟，一起辙中鳞。

奉送二十三舅录事崔伟之摄郴州

贤良归盛族，吾舅尽知名。徐庶高交友，庶与崔州平善，盖以州平比伟。刘牢出外甥。泥涂岂珠玉，环堵但柴荆。衰老悲人世，驱驰厌甲兵。气春江上别，泪血渭阳情。舟鹢排风影，林乌反哺声。永嘉多北至，句漏且南征。必见公侯复，终闻盗贼平。郴州颇凉冷，橘井尚凄清。从役一作事何蛮貊，居官志在行。

送魏二十四司直充岭南掌选崔郎中判官，兼寄韦韶州岭南交、黔等州，得任土人，以郎中、御史充使选补，谓之南选。

选曹分五岭，使者历三湘。才美膺推荐，君行佐纪纲。佳声斯一作期共一作不远，雅节在周防。明白山涛鉴，嫌疑陆贾装。故人湖外少，春日岭南长。凭报韶州牧，新诗昨寄一作夜

将。

送赵十七明府之县

连城为宝重，茂宰得才新。山雉迎舟楫，江花报邑人。论交翻恨晚，卧病却愁春。惠爱南翁悦，余波及老身。

燕子来舟中作

湖南为客动经春，燕子衔泥两度新。旧人故园常识主，如今社日远看人，可怜处处巢君一作居室，何异飘飘托此身。暂语船樯还起去，穿花落水范德机云：善本作帖水。益沾巾。

同豆卢峰知字韵一本作同豆卢峰贻主客李员外子荣知字韵

炼金欧冶子，喷玉大宛儿。符彩高无敌，聪明达所为。梦兰他日应，折桂早年知。烂漫通经术，光芒刷羽仪。谢庭瞻不远，潘省会于斯。倡和将雏曲，田翁号鹿皮。

归雁二首

万里衡阳雁，今年又北归。双双瞻客上，一一背人飞。云里相呼疾，沙边自宿稀。系书元一作无浪语，愁寂一作绝故山薇。

欲雪违胡地，先花别楚云。却过清渭影，高起洞庭群。塞北春阴暮，江南日色曛。伤弓流落羽，行断不堪闻。

小寒食舟中作

佳辰强饭一作饮食犹寒，隐几萧条带鹖冠。春水船如天上坐，老年药似雾中看。娟娟戏蝶过闲一作开幔，

片片轻鸥下急湍。云白山青万余里，
愁看直一作西北是长安。

清明二首

朝来新火起新烟，湖色春光净客船。
绣羽衔一作冲花他自得，红颜骑竹我无缘。
胡童结束还难有，楚女腰肢亦可怜。
不见定王城汉长沙定王发封此旧处，
长怀贾傅井依然。虚沾焦宜作周举为寒食，
实藉严君卖卜钱。钟鼎山林各天性，
浊醪粗饭任吾年。

此身飘泊苦西东，右臂偏枯半耳聋。
寂寂系舟双下泪，悠悠伏枕左书空。
十年蹴鞠将雏远，万里秋千习俗同。
旅雁上云归紫塞，家人钻火用青枫。
秦城楼阁烟花一作莺花里，汉主山河锦绣中。
风水一作春去春来洞庭阔，白蘋愁杀白头翁。

发潭州时自潭之衡

夜醉长沙酒，晓行湘水春。岸花飞送客，
檐燕语留人。贾傅才未有，褚公书绝伦。
高名前后事，回首一伤神。

回棹

宿昔试一作世安命，自私犹畏天。
劳生系一物，为客费多年。衡岳江湖大，
蒸池蒸水在衡阳城北疫疠偏。散才罢薄一作旧俗，
有迹负前贤。巾拂那关眼，瓶罍易满船。
火云滋垢腻，冻雨浥沉一作尘绵。强饭莼添滑，
端居茗续煎。清思汉水上，凉忆岷山巅。

顺浪翻堪倚，回帆又省牵。吾家碑社预碑不昧，
王氏井依然。几杖将衰齿，茅茨寄短椽。
灌园曾取适，游寺可终焉。遂性同渔父，
成名一作功异鲁连。篙师烦尔送，朱夏及寒泉。

赠韦七贻善

乡里衣冠不乏贤，杜陵韦曲未央前。
尔家最近魁三象，原注：斗魁下两两相比为三台。
时论同归一云因侵尺五天。原注：俚语云：城南韦杜，
去天尺五。北走关山一作河开雨雪，南游花柳塞云一作风烟。
洞庭春色悲公子，虾菜忘归范蠡一作万里船。

奉一本无奉字酬寇十侍御锡见寄四韵，复寄寇

往别郾瑕地，于今四十年。来簪御府笔，
故泊洞庭船。诗忆伤心处，春深把臂前。
南瞻按百越，黄帽待君偏。

酬郭十五受判官

才微岁老一作晚尚虚名，卧病江湖春复生。
药裹关心诗总废，花枝照眼句还成。只同燕石能星陨，
自得隋珠觉夜明。乔口橘洲风浪促，系帆何惜片时程。

衡州送李大大夫七丈勉赴广州

斧钺下青溪，楼船过洞庭。北风随爽气，
南斗避文星。日月笼中鸟，乾坤水上萍。
王孙丈人行，垂老见飘零。

全唐诗卷二百三十四

杜甫 补遗

哭长孙侍御一作杜诵诗○以下四首，他集互见。

道为谋一作谏，一作诗书重，名因赋颂雄。礼闈曾擢桂，宪府旧一作近乘骢。流水生涯尽，浮云世事空。唯余旧台柏，萧瑟九原中。

虢国夫人一作《张祜集》灵台二首之一

虢国夫人承主恩，平明上马入宫祜。集作金门。却嫌脂粉涴颜色，澹扫蛾眉朝至尊。

军中醉饮寄沈八、刘叟一作杨当诗

酒渴爱江清，余甘一作酣漱晚汀。软沙欹坐稳，冷石醉眠醒。野膳随行帐，华音发从伶。数杯君不见，醉一作都已遣沉冥。

杜鹃行一作司空曙诗

古时杜宇称望帝，魂作杜鹃何微细。跳枝窜叶树木中，抢佯一作翔瞥掠雌随雄。毛衣惨黑貌一作自憔悴，众鸟安宥相尊崇。隳一作陋形不敢栖华屋，短翻唯愿巢深丛。穿皮啄朽嘴

欲秃，苦饥始得食一虫。谁言养雏不自哺，此语亦足为愚蒙。声音咽咽如一作啾若有谓，号啼略与婴儿同。口干垂血转迫促，似欲一作欲以上诉于苍穹。蜀人闻之皆起立，至今教学一作相教传遗风，乃知变化不可穷。岂知昔日居深宫，嫔嫱一作妃左右如花红。

闻惠二过东溪特一送一作送惠二归故居。一作闻惠子白过东溪。以下七首，吴若本逸诗。

惠子驹一作鱼，一作驴瘦，归溪唯病身。皇天无老眼，空谷滞一作值斯人。崖蜜松花熟一作白，一作古，山杯一作村醪竹叶新一作春。柴门了无一作生事，黄一作园绮未称臣。

舟泛洞庭一作过洞庭湖

蛟室围青草，龙堆拥一作隐白沙。护江一作堤盘古木，迎棹舞神鸦。破浪南风正，收帆一作回樯，一作归舟畏日斜。云山千万叠，底处上仙槎。一作湖光与天远，直欲泛仙槎。

李盐铁二首一首题作李监宅，已见第九卷中。

落叶一作华馆春风起，高城烟雾开。杂花分户映，娇燕入檐回。一见

能倾产一作座，虚怀只爱才。盐官虽
绊骥，名是汉庭来。

长吟

江渚翻鸥戏，官桥带柳阴。江飞
竞渡日，草见蹋春一作青心。已拨形
骸累，真为烂漫深。赋诗歌一作新句
稳，不免一作觉自长吟。

绝句九首前六首已见第十三卷中

闻道巴山里，春船正好行一作还。
都将百年兴，一望九江城一作山。

水槛温江口，茅堂石笋西。
移船先主庙，洗药浣沙一作花溪。
设一作谩道春来好，狂风大放颠。吹
一作飞花随水去，翻却钓鱼船。

瞿唐怀古以下草堂逸诗拾遗

西南万壑注，勍敌两崖开。地与
山根裂，江从月窟来。削成当白帝，空
曲隐阳台。疏凿功虽美，陶钧力大哉。

送司马入京

群盗至今日，先朝忝从臣。叹君
能恋主，久客羨归秦。黄阁长司谏，丹
墀有故人。向来论社稷，为话涕沾巾。

惜别行，送刘仆射判官仆射乃其主
将，刘乃仆射之判官也。

闻道南行市骏马，不限匹数军一
作官中须。襄阳幕府天下异，主将俭
省优艰虞。只收壮健铁胜甲，岂因格
斗求龙驹。而今西北自反胡，骐驎荡
尽一匹无。龙媒真种在帝都，子孙永
落西南隅。向非戎事备征伐，君肯辛

苦越江湖。江湖凡马多憔悴，衣冠往
往乘蹇驴。梁公疑梁崇义，曾为山南
节度。富贵于身疏，号令明白人安居。
俸钱时散士子尽，府库不为骄豪虚。
以兹报主寸心赤，气却西戎回北狄。
罗网群马籍一作藉马多，气一作用在
驱驰出金帛。刘侯奉使光推择，滔滔
才略沧溟窄。杜陵老翁秋系船，扶病
相识长沙驿。强梳白发提胡卢，手把
一作兼菊花路旁摘。九州兵革浩茫
茫，三叹聚散临重阳。当杯对客忍流
涕一作涕泪，君一无君字不觉老夫神
内伤。

呀张口貌鹞行

病鹞孤一作卑飞俗眼丑，每夜江
边宿衰柳。清秋落日一作月已侧身，
过雁归鸦错回首。紧脑雄姿迷所向，
疏翻稀毛不可状。强神迷复皂雕前，
俊才早在苍鹰上。风涛飒飒寒山阴，
熊罢欲蛰一作紫龙蛇深。念尔此时有
一掷，失声溅血非其心。

狂一作短歌行，赠四兄

与兄行年校一岁，贤者是兄愚者
一作是弟。兄将富贵等浮云，弟切功
名好权势。长安秋雨十日泥，我曹鞞
马听晨鸡。公卿朱门未开锁，我曹已
到肩相齐。吾兄睡稳方舒膝，不袜不
巾蹋晓日。男啼女哭莫我知，身上须
缠腹中实。今年思我来嘉州，嘉州酒
重一作香花绕一作。满楼。楼头吃酒
楼下卧，长歌短咏一作歌还相酬。四
时八节还拘礼，女拜弟妻男拜弟。幅
巾鞶带不挂身，头脂足垢何曾洗。吾
兄吾兄巢许伦，一生喜怒长任真。日
斜枕肘寝已熟，啾啾唧唧为何一作何

为人。右五篇，乃苏州太守裴煜如晦所收，见旧集《补遗》。

逃难

五十头白翁，南北逃世难。疏布缠枯骨，奔走苦不暖。叶去声。已衰病方入，四海一涂炭。乾坤万里内，莫见容身畔。妻孥复随我，回首共悲叹。故国莽丘墟，邻里各分散。归路从此迷，涕尽湘江岸。

寄高适

楚隔乾坤远，难招病客魂。诗名惟我共，世事与谁论。北阙更新主，南星落故园。定知相见日，烂漫倒芳尊。

送灵州李判官

犬戎腥四海，回首一茫茫。血战乾坤赤，氛迷日月黄。将军专策略，幕府盛材良。近贺中兴主，神兵动朔方。

与严二郎奉礼别

别君谁暖眼，将老病缠身。出涕同斜日，临风看去尘。商歌还入夜，巴俗自为邻。尚愧微躯在，遥闻盛礼新。山东群盗散，阙下受降频。诸将归应尽，题书报旅人。

巴西驿亭观江涨，呈窦使君二首

转惊波作怒一作悉，即恐岸随流。赖有怀中物，还同海上鸥。关心小剡县，傍眼见扬州。为接情人饮，朝来减半一作片愁。

向晚波微一作犹绿，连空岸脚青。

日兼春有暮，愁与醉无醒。漂泊犹杯酒，踟躇此驿亭。相看万里外，同是一浮萍。

遣忧

乱离知又甚，消息苦难真。受谏无今日，临危忆古人一作伤故臣。纷纷乘白马，攘攘著黄巾。隋氏留一作营营室，焚烧何太频。吴曾《漫录》云：见顾陶《类选》。

早花

西京安隐未，不见一人来。腊日一作月巴江曲，山花已自开。盈盈当雪杏，艳艳待春一作香梅。直若风尘暗，谁忧容一作客鬓摧。

巴山

巴山遇中使，云自峡一作陕城来。盗贼还奔突，乘舆恐未回。天寒邵伯树，地阔望仙台。狼狽风尘里，群臣安在哉。

收京一本有阙字

复道收京邑，兼闻杀犬戎。衣冠却扈从，车驾已还宫。克复成如此，发危一作扶持在数公。莫令回首地，恸哭起悲风。

巴西闻收宫阙，送班司马入京

闻道收宗庙，鸣銮自陕归。倾都看黄屋，正殿引朱衣。剑外春天远，巴西敕使稀。念君经世乱，匹马向王畿。

花底

紫萼扶千蕊，黄须照万花。忽疑

行暮雨，何事人朝霞。恐是潘安县，堪留卫玠车。深知好颜色，莫作委泥沙。

柳边

只道梅花发，那知柳亦新。枝枝总到地，叶叶自开春。紫燕时翻翼，黄鹂不露身。汉南应老尽，霸上远愁人。

送窦九归成都

文章亦不尽，窦子才纵横。非尔更苦节，何人符大名。读书云阁观，问绢锦官城。我有浣花竹，题诗须一行。

赠裴南部，一本以下作原注闻袁判官自来欲有按问

尘满莱芜甑，堂横单父琴。人皆知饮水，公辈不偷金。梁狱书因上一作应作，秦台镜欲临。独醒时所嫉，群小谤能深。即出黄沙在，何须白发侵。使君传旧德，已见直绳心。

奉使一作送崔都水翁下峡

无数涪江筏，鸣桡总发时。别离终不久，宗族忍相遗。白狗黄牛峡，朝云暮雨祠。所过频问讯，到日自题诗。

题郾县郭三十二明府茅屋壁

江头且系船，为尔独相怜。云散灌坛雨，春青彭泽田。频惊适小国，一拟问高天。别后巴东路，逢人问几贤。

遣闷戏呈路十九曹长

江浦雷声喧昨夜，春城雨色动微寒。黄鹂并坐交愁湿，白鹭群飞大剧干。晚节渐于诗律细，谁家数去酒杯宽。惟吾最一作君醉爱清狂客，百遍

相看一作过意未阑。

随章留后新亭会送诸君

新亭有高会，行子得良时。日动映江幕，风鸣排槛旗。绝荤终不改，劝酒一作醉欲无词一作辞。已堕岷山泪，因题零雨诗。

东津送韦讽摄阆州录事

闻说江山好，怜君吏隐兼。宠行舟远泛，怯一作惜别酒频添。推荐非承乏，操持必去嫌。他时如按县，不得慢陶潜。

客旧馆

陈迹随人事，初秋别此亭。重来梨叶赤，依旧竹林青。风幔何一作前时卷，寒砧昨夜声当作听。无由出江汉，愁绪一作秋渚一作日月冥冥。

阆州奉送二十四舅使自京赴任青城

闻道王乔舄，名因太史传。如何碧鸡使，把诏紫微天。秦岭愁回马，涪江醉泛船。青城漫污杂，吾舅意凄然。

愁坐

高高常见野，愁坐更临门。十月山寒重，孤城月水一作水气昏。葭萌氏种迥，左袒犬戎存一作屯。终日忧奔走，归期未敢论。

陪邓公秋晚北池临眺

北池云水阁，华馆辟秋风。独鹤元依渚，衰荷且映空。采菱寒刺上，蹋藕野泥中。素楫分曹往，金盘小径通，

萋萋露草碧，片片晚旗红。杯酒沾津吏，衣裳与钓翁。异方初艳菊，故里亦高桐。摇落关山思，淹留战伐功。严城殊未掩，清宴已知终。何补参卿事，一作军乏，欢娱到薄躬。

去蜀

五载客蜀郡，一年居梓州。如何关塞阻，转作潇湘游。世一作万事已黄发，残生随白鸥。安危大臣在，不一作何必泪长流。

放船

收帆下急水，卷幔逐回滩。江市戎戎暗，山云念念寒。村荒一作荒林无径入，独鸟怪人看。已泊城楼底，何曾夜色阑。

哭台州郑司户苏少监

故旧谁怜我，平生郑与苏。存亡不重见，丧乱独前途。豪俊何人一作人谁在，文章扫地无。羁游万里阔，凶问一年俱。白首中原上，清秋大海隅。夜台当北斗，泉路著一作宵东吴。得罪台州去，时危弃硕儒。移官蓬阁后，谷贵没潜夫。流恻嗟何及，衔冤有是夫。道消诗兴废，心息酒为徒。许与才虽薄，追随迹未拘。班扬名甚盛，嵇阮逸相须。会取君臣合，宁铨品命殊。贤良不必展，廊庙偶然趋。胜决风尘际，功安造化炉。从容拘一作询旧学，惨澹阒阴符。摆落嫌疑久，哀伤志力输。俗依绵谷异，客对雪山孤。童稚思诸子，交朋列友于。情乖清酒送，望绝抚坟呼。疴病一作痢餐巴水，疮痍老蜀都。飘零迷哭处，天地日榛芜。右二十七篇，朝奉大夫员安宇所收。

送王侍御往东川，放生池祖席

东川诗友合，此赠怯轻为。况复传宗近，空然惜别离。梅花交近野，草色向平池。倘忆江边卧，归期愿早知。

惠义寺送王少尹赴成都得峰字

苒苒谷中寺，娟娟林表峰。阑干上处远，结构坐来重。骑马行春径，衣冠起晚一作暮钟。云门青一作春寂寂，此别惜相从。右二篇见王原叔本。

避地

避地岁时晚，窜身筋骨劳。诗书遂一作逐墙壁，奴仆且旌旄。行在仅闻信，此生随所遭。神尧旧天下，会见出腥臊。右一篇见赵次翁本，题云：至德二载丁酉作。

惠义寺园送辛员外

朱樱此日垂朱实，郭外谁家负郭田。万里相逢贪握手，高才却望足离筵。

又送

双峰寂寂对春台，万竹青青照一作送客杯。细草留连侵坐软，残花怅望近人开。同舟昨日何由得，并马今朝未拟回。直到绵州始分首，江边树里共推来。右二篇见卞圜本，并见吴若本。

九日登梓州城

客心惊暮序，宾雁下襄一作沧州。共载重阳节，言寻戏马游。湖风秋一作扶成柳，江雨暗山楼。且酌东篱菊，

聊祛南国愁。右一篇见《文苑英华》。

句

阙题

三月雪连夜，未应伤物华。只缘
春欲尽，留著伴梨花。右一首及下逸
句，见《合璧事类》。

寒食少天气，东风多柳花。

小桃知客意，春尽始开花。

全唐诗卷二百三十五

贾至

贾至，字幼邻，洛阳人。父曾，开元初掌制诰。至擢明经第，为单父尉，拜起居舍人、知制诰。父子继美，帝常称之。肃宗擢为中书舍人。坐小法，贬岳州司马。宝应初，召复故官，除尚书左丞。大历初，封信都县伯，迁京兆尹、右散骑常侍。卒，谥曰文。集十卷。今编诗一卷。

自蜀奉册命往朔方途中呈韦左相、文部房尚书、门下崔侍郎

胡羯乱中夏，銮舆忽南巡。衣冠陷戎寇，狼狽随风尘。幽公秉大节，临难不顾身。激昂白刃前，溅血下沾巾。尚书抱忠义，历险披荆榛。扈从出剑门，登翼岷江滨。时望挹侍郎，公才标缙绅。亭亨昆山玉，皎皎无缁磷。顾惟乏经济，扞牧陪从臣。永愿雪会稽，仗一作一剑清咸秦。太皇时内禅，神器付嗣君。新命集旧邦，至德被远人。捧册自南服，奉诏趋北军。覲谒心载驰，违离难重陈。策马出蜀山，畏途上缘云。饮啄丛箐间，栖息虎豹群。峭壁凌危机，惴栗一作悚惊心神。峭壁上嵌岑，大江下沄沄。皇风扇八极，异类怀深仁。元凶诱黠虏，肘腑生妖氛。明主信英武，威声赫四一作殊邻。誓

师自朔方，旗帜何缤纷。铁骑照白日，旄头拂秋旻。将来一作候荡沧溟，宁止蹴昆仑。古来有屯难，否泰长相因。夏康纘禹绩，代祖复汉勋。于役各勤王，驱驰拱紫宸。岂惟太公望，往昔逢周文。谁谓三杰才，功业独殊伦。感此慰行迈，无为歌苦辛。

赠裴九侍御昌江草堂弹琴

朔风吹疏林，积雪在崖巘。鸣琴草堂响，小涧清且浅。沉吟东山意，欲去芳岁晚。怅望黄绮心，白云若在眼。

巴陵早秋，寄荆州崔司马、吏部尚书功曹舍人

谪居潇湘渚，再见洞庭秋。极目连江汉，西南浸斗牛。滔滔荡云梦，澹澹摇巴丘。旷如临渤澥，官疑造瀛洲。君山雨中波，苍翠长夜浮。帝子去永久，楚词尚悲秋。我同长沙行，时事加百忧。登高望旧国，胡马满东周。宛叶遍蓬蒿，樊邓无良畴。独攀青枫树，泪洒沧江流。故人西掖寮，同扈岐阳蒐。差池尽三黜，蹭蹬各南州。相去虽地接一作近，不得从之游。耿耿云阳台，迢迢王粲楼。跂予暮霞里，谁谓无轻舟。

闲居秋怀，寄阳翟陆贽府、封丘高少府

今日霖雨霏，飒然高馆凉。秋风吹二毛，烈士加慨慷。忆昔皇运初，众宾俱龙骧。解巾佐幕府，脱剑升明堂。郁郁被庆云，昭昭翼太阳。鲸鱼纵大壑，鸞鷟鸣高冈。信矣草创时，泰阶速贤良。一言顿遭逢，片善蒙恩光。我生属圣明，感激窃自强。崎岖郡邑权，连蹇翰墨场。天朝富英髦，多士如圭璋。盛才溢下位，蹇步徒猖狂。闭门对群书，几案在我旁。枕席想远游，聊欲浮沧浪。八月白露降，玄蝉号枯桑。舣舟临清川，迢递愁思长。我有同怀友，各在天一方。离披不相见，浩荡隔两乡。平生霞外期，宿昔共行藏。岂无蓬菜树，岁晏空苍苍。

送友人使河源

送君鲁郊外，下车上高丘。萧条千里暮，日落黄云秋。举酒有余恨，论边无远谋。河源望不见，旌旆去悠悠。

送李侍御

我年四十余，已叹前路短。羁离洞庭上，安得不引满。李侯忘情者，与我同疏懒。孤帆泣潇湘，望远心欲断。

送耿副使归长沙

画舸欲南归，江亭且留宴。日暮湖上云，萧萧若流霰。昨夜相知者，明发不可见。惆怅西北风，高帆为谁扇。

送夏侯子之江夏

扣楫洞庭上，清风千里来。留欢一杯酒，欲别复裴回。相见楚山下，渔

舟忆钓台。羨君还旧里，归念独悠哉。

寓言二首

春草纷碧色，佳人旷无期。悠哉千里心，欲采商山芝。叹息良会晚，如何桃李时。怀君晴川上，伫立夏云滋。

凛凛秋闺夕，绮罗早知寒。玉砧调鸣杵，始捣机中纨。忆昨别离日，桐花覆井栏。今来思君时，白露盈阶漙。闻有关河信，欲寄双玉盘。玉以委贞心，盘以荐嘉餐。嗟君在万里，使妾衣带宽。

燕歌行

国之重镇惟幽都，东威九夷北制胡。五军精卒三十万，百战百胜擒单于。前临滹沱后一作阻易水，崇山沃野亘千里。昔时燕山重贤士，黄金筑台从隗始。倏忽兴王定一作亡空薊丘，汉家又以封王一作五侯。萧条魏晋为横流，鲜卑窃据朝五州。我唐区夏余十纪，军容武备赫万祀。彤弓黄钺授元帅，垦耕大漠为内地。季秋胶折边草肥，治兵羽猎因出师。千营万队连旌旗，望之如火忽电驰。匈奴慑窜穷发北，大荒万里无尘飞。君不见一本无君不见三字隋家昔为天下宰，穷兵黩武征辽海。南风不竞多死声，鼓卧旗折黄云横。六军将士皆死尽，战马空鞍归故营。时移一作迁道革天下平，白环入贡沧海清。自有农夫已高枕，无劳校尉重横行。

巴陵寄李二户部、张十四礼部时贬岳州司马

江南春一作芳草初暮暮，愁杀江